



18. januar 2011

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

Umiarsuarsuit takornariartaatit Ittoqqortoormiit Kangerlussuanut killilimmik pulasarnissaat Naalakkersuisut aaqqiivigilersaarpaat?

(Inatsisartunut ilaasortaq Harald Bianco, Inuit Ataqatigiit)

Tungavilersuut

Ukioq 2010 aasap ingerlanerinnaani umiarsuarsuit takornariartaatit 15 missilliorlugit amerlassusillit Ittoqqortoormiit Kangerlussuanut pulapput. Pulanerminni qilalukkanik qimaatitseqattaartarput. Qilalukkat takugaangamikkit ornittarpaat siggartarfigalugillu tamitillarlugit.

Avanersuarmi Tunumilu qilalugarniarneq pinaartunit peqqissaaruteqqissarneqartarpoq. Qillugaqarfiit tikikkaangamikkit piniartut nipaarsaaqqissaartarput, qoorortuuqqamilluunniit seqqorumaneq ajortarput qilalukkanik takunnginnerminnik. Naluneqanngilarlu umiarsuarsuit takornariartaatit qanoq nipitutigisut, ingammik siggartaassui nipitusaqalutik.

Umiarsuarsuit takornariartaatit Ittoqqortoormiit Kangerlaussuanut pulasalermatali, tassa ni qilalukka ingerlaarfitik allanngortippaat, piniartunut ajoqutaasumik. Tappavani piniartut aarleqqutigaat, umiarsuarsuit aasat tamaasa kangerlussuarmut pulasartut amerliartuinnartut qilalukkanik nujoqqatitsillutik akornutaagajuttuinnarnissaat. Assullu kissaatigigaluarpaat, kangerlummuk killilimmik pulasarnissaat, Milne Land illuatungaanilu Syd Kap killigalugit taamaallaat pulasarnissaat. Piniartoqarfik illersorneqassapat isumaqarpunga Naalakkersuisut taamatut aalajangersagaliortariaqartut.